

Passantà ün temp intensiv

Cunfins serrats, l'aspettativa da blers paziants e la temma cha personal as pudess infettar, quai d'eiran be ün pêr da las sfidas dals ultims mais dal directer da l'Ospidal Scuol.

Il Cussagl federal ha introdüt pel principi da quist'eivna novas restricziuns cunter il cumbat da la pandemia dal coronavirus. Tanter oter esa obligatoric da portar üna mascrina i'l tren, auto da posta, sülla barcha o illas pendicularas. Joachim Koppenberg, il directer da l'Ospidal Scuol, salüda quistas masüras. El e'ls impiegats han passantà ün temp intensiv.

Pronts pel cas il plü mal

«In marz d'eiran ils purtretts da l'Italia preschaints ed i'l Tessin creschivan ils cas d'infecziun», s'algora il meidi Koppenberg. Pacs dis plü tard d'eira la situaziun in tuot la Svizra gnüda seriusa e'ls ospidals s'han preparats pel cas il plü mal. «Il Chantun ha reagi fich svelta e nus nu savaivan che chi'ns spetta.» Quai eir pervi cha l'Engiadina Bassa d'eira tanter duos hotspots dal coronavirus: In Engiadin'Ota daiva ils prüms cas ed ad Ischgl s'han infettadas diversas persunas cul nouv virus. «Fingià la fin dal mais favrer vaiva cumanzà il stab da crisa da l'ospidal cun sia lavur», declera'l. In quel mumaint s'haja augmantà il nomer da lets da 30 a 54. Quista masüra ha gnü per consequenza chi ha fat dabsögn da daplü material. «Nus vain eir fat la scolaziun correspudenta cun nos personal», uschè il directer.

Actualmaing es la situaziun stabila

La situaziun es lura dvantada pels respunsabels da l'ospidal plü critica. Sper la prognosa chi d'eira da far quint cun blers paziants e'l privel cha'l personal pudess gnir amalà ha serrà il Cussagl federal ils cunfins. «La mità da marz sun quels gnüts serrats», disch Joachim Koppenberg ed agiundscha, «passa 50 pertschient da noss impiegats derivan da l'Austria o dal Tirol dal süd.» Tenor el s'haja resguardà in Engiadina Bassa fich bain las restricziuns cunter la pandemia dal coronavirus. Pro passa 20 persunas d'eira il test d'infettaziun positiv. «Trais persunas vaina flià pro nus ed üna persuna es morta dal coronavirus», uschè las indicaziuns dal directer. L'ultim test positiv a l'Ospidal Scuol es gnü registrà al principi d'avrigl, «e daspö quel mumaint es la situaziun in nossa regiun stabila».

«Schlockiada gnüda massa bod»

A l'Ospidal Scuol valan inavant las masüras severas da protecziun. Per Joachim Koppenberg es la schlockiada dals 22 gün gnüda massa bod. «Il plaschair cha la glied ha per viagiar am fa pissers», manzuna'l. Seis giavüsche per ün obligatori da portar mascrinas i'l trafic public es intant gnü accumulì. El racumonda da tillas portar eir in quels mumaints cha la distanza precritta nu po gnir resguardada o schi s'es

in üna gruppa da personas. «Las mascrinas nu cuostan bler e minchün tillas po portar.» El cussaglia da far adöver da l'app «Swisscovid ». Percunter nu racumanda'l da far il test dals anticorps. «Quists tests nu sun amo uschè expressivs.» A partir dal prossem mais as parteciparà l'Ospidal da Scuol ad ün stüdi d'anticorps cha l'Ospidal chantunal ha inizià. (fmr/afi)



L'Ospidal da Scuol d'eira pront per fliar paziants infettats cul coronavirus.

fotografia: Center da sandà Engiadina Bassa



Joachim Koppenberg, il directer da l'Ospidal Scuol, d'eira confrontà cun diversas sfidas i'l temp dal coronavirus.